



Broj: 01/2,03/11-05-1-217/15  
Datum: 5.10.2015.

KOLEGIJ PREDSTAVNIČKOG DOMA PSBiH  
KOLEGIJ DOMA NARODA PSBiH

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 27-10-2015			
Organizaciona jedinica	Klasifikaciona oznaka	Redni broj	Broj priloga

Predmet: Izvještaj s Prvog evroazijskog foruma žena,  
Sankt.Petersburg, 23.-25.9.2015.

Predsjedavajuća Komisije za vanjske poslove Predstavničkog doma Parlamentarne skupštine BiH Dušanka Majkić, na poziv Galine Karelove, zamjenice predsjednika Vijeća Federacije Federalne skupštine Ruske Federacije, učestvovala je na Prvom evroazijskom forumu žena. Forum je održan u dvorcu Tavričeksi u Sankt Petersburgu, od 23. do 25. septembra 2015., pod sloganom "Ka miru, harmoniji i socijalnom blagostanju". Forumom je predsjedavala Valentina Matvijenko, predsjednica Vijeća Federacije Federalne skupštine Ruske Federacije (gornji dom) i predsjednica Interparlamentarne skupštine Zajednice nezavisnih država.

Na Forumu su učestvovali poslanici, predstavnici izvršne vlasti, poslovnog svijeta i nevladinog sektora, kao i istaknuti predstavnici svjetskog međunarodnog feminističkog pokreta, odnosno oko 750 delegata iz 80 zemalja i s 5 kontinenata, dajući ovom događaju ne samo evroazijski nego i globalni karakter. Uprkos sankcijama Zapada prema Rusiji, među zemljama koje su bile zastupljene su i SAD, zemlje zapadne Evrope i Australije.

Temе Foruma o kojima se razgovaralo na plenarnom zasjedanju, u panel diskusijama i na okruglim stolovima su, između ostalog, pitanja socijalne sigurnosti i održivog razvoja, međunarodne saradnje s ciljem ostvarivanja povjerenja i napretka, te jačanje uloge žena u privrednim reformama, politici i društvenim integracijama.

Otvarajući plenarnu sesiju Foruma, Matvijenkova je rekla da je i sama tema "Ka miru, harmoniji i socijalnom blagostanju" u skladu s rastućom potrebom da se, usljed promjena koje se dešavaju u svijetu, za sve narode i sve zemlje osiguraju mogućnosti za pristojan život, a žene se vide kao oni akteri koji najlakše dolaze do praktičnih rješenja. U uvodnom obraćanju Matvijenkova je rekla da, iako se ravnopravnost spolova smatra najznačajnijim dostignućem 20. vijeka, to još uvijek nije stvarnost u mnogim zemljama,

a sve dok se to ne desi, svijet se ne može smatrati civiliziranim. Također je rekla da Zapad nije homogen, sudija i arbitar sudbine čovječanstva, te da se politički, ekonomski i kulturni uticaj u međunarodnoj areni pomjera ka novim državama koje se dinamično razvijaju, što dovodi do pojave multipolarnog i policentričnog svijeta.

Na plenarnoj sesiji istaknuto je uvjerenje da žene mogu dati značajan doprinos humaniziranju međunarodnih odnosa, fokusirajući se na izgradnju pravednog svjetskog poretka, te postizanju harmonije i napretka, izgradnji povjerenja i razumijevanja među narodima.

Dani Evroazijskog foruma žena podudarili su se sa 70. godišnjicom od završetka Drugog svjetskog rata i osnivanja Ujedinjenih naroda, a govornici su se dotakli i problema izbjeglica. Naglašena je potreba za zaustavljanjem eskalacija nasilja na Bliskom istoku i u Africi, a međunarodna zajednica pozvana je da se pridruži naporima za postizanje mira, stabilnosti i prosperiteta u konfliktnim regionima.

Skupu se obratila i Svetlana Medvedeva, predsjednica ruskog Fonda socijalno-kulturnih inicijativa i supruga premijera Rusije Dmitrija Medvedeva, koja je rekla da se u savremenom svijetu vodi kampanja protiv tradicionalne porodice, te da Rusija neće pristati na uništavanje tradicionalnih vrijednosti koje savremenog čovjeka štite od agresivne okoline, a da se samo zajedničkim naporima države i društva mogu postići ti ciljevi.

U završnom dokumentu, koji je u prilogu ovog izvještaja, a čijim usvajanjem je zatvoren dvodnevni forum, naglašava se važnost jačanja uloge žena u ostvarivanju globalnih ciljeva održivog razvoja, primjena nove agende Ujedinjenih naroda za razvojni period nakon 2015. godine, sveobuhvatno i garantirano učešće i napredovanje žena u vlasti i u političkom životu, na izborima na svim nivoima, te uklanjanje pravnih, administrativnih, kulturnih i ekonomskih prepreka za to. Istaknuta je i potreba za jačanjem institucija porodice i materinstva, kao i zaštitom fizičkog i moralnog zdravlja naroda, na jačanju moralnih i etičkih standarda u međusobnim odnosima.

Učesnice Foruma zaključile su da je potrebno hitno riješiti životno važne probleme migranata s Bliskog istoka, žena, djece i omladine, koji su prisiljeni napustiti svoje domove, što je dovelo do tragičnih incidenata i loših reakcija u zemljama prijema.

Jedna od najvažnijih poruka Foruma je da žene moraju imati jednu od najvažnijih uloga u sudbini Evroazije, stvarajući parametre slobodnog i ravnopravnog dijaloga naroda i kultura.

Zaključak Foruma je i da jedan ovakav međunarodni događaj, sa širokom zastupljenošću učesnika iz svih sfera i sa svih strana svijeta, dobije stalni status.

Učesnici su, također, zaključili da je Forum pokazao koliko je svijet suočen s problemima, koliko je novih hitnih pitanja koja traže brzo rješavanje, a njihovo rješenje traži učešće žena.

Dogovoreno je da se sljedeći Evroazijski forum žena održi 2018. godine u Sankt Petersburgu.

Izveštaj pripremila

Nataša Čabak



Izveštaj odobrila

Dušanka Majkić



predsjedavajuća Komisije za

vanjske poslove PDPSBiH

Prilog:

- Završni dokument Evroazijskog foruma žena

Dostaviti:

- naslovu

- Komisiji za vanjske poslove PDPSBiH

- a/a

Evroazijski forum žena

## ZAVRŠNA REZOLUCIJA Evroazijskog foruma žena

Ruska Federacija  
Sankt Petersburg

24. i 25. septembar 2015.

**MI, UČESNICE EVROAZISJKOG FORUMA**, okupljene u Sankt Petersburgu u godini u kojoj obilježavamo sedamdesetu godišnjicu od završetka Drugog svjetskog rata i od osnivanja Ujedinjenih naroda,

*ujedinjene zajedničkim* pogledom na budućnost našeg kontinenta kao jedinstvenog prostora harmonije, mira, pravde, saradnje i sigurnosti, zajedničkih vrijednosti i jednakih mogućnosti, prava i sloboda za sve,

*privržene* ravnopravnosti i urođenim ljudskim vrijednostima žena i muškaraca, kao i drugim ciljevima i principima, proklamiranim

u Povelji Ujedinjenih naroda,

u Općoj deklaraciji o ljudskim pravima i drugim međunarodnim dokumentima o ljudskim pravima,

u Konvenciji o eliminaciji svih oblika diskriminacije žena i Konvenciji o pravima djeteta,

u Deklaraciji o eliminaciji nasilja nad ženama i Deklaraciji o pravu na razvoj,

*uvjere* da žene mogu i moraju imati odlučujuću ulogu u današnjem svijetu, stvarajući novu dimenziju dijaloga među narodima i kulturama, olakšavajući oporavak društva suočenog s duhovnim i moralnim izazovima,

*odlučne* da koristimo široke mogućnosti koje su na raspolaganju ženama u 21. vijeku za rješavanje gorućih problema i nalaženje efikasnih odgovora na izazove našeg vremena, koji su, prije svega, pitanje izbjeglica i raseljenih osoba uzrokovanih oružanim sukobima,

*potvrđujući potrebu* da se promovira sveobuhvatni društveno-orijentirani održivi razvoj i jačanje institucije porodice, djeteta i majke; za zaštitu fizičkog i duhovnog zdravlja naših naroda i okoline te za promoviranje ekološke sigurnosti u svim ljudskim aktivnostima,

**KONSTATUJEMO** da je Prvi evroazijski forum žena demonstrirao pozitivni trend ka konsolidaciji međunarodne ženske zajednice za mir, harmoniju i socijalno blagostanje,

SMATRAMO novi plan za razvoj nakon 2015., koji je podnesen na usvajanje Generalnoj skupštini Ujedinjenih naroda, univerzalnim programom aktivnosti za ostvarivanje globalnih ciljeva održivog razvoja,

PRIMJEĆUJEMO da žene postaju sve uključeniije u socijalne i ekonomske napore te da doprinose jačanju međunarodne saradnje u svim sferama. Žene širom svijeta igraju važnu ulogu u zalaganju za zdrav stil života, principe socijalne pravde, dobrotvorne aktivnosti i podršku humanitarnim projektima,

**OSUĐUJEMO I SNAŽNO SE SUPROTSTAVLJAMO** političkim i drugim sankcijama, koje uključuju i parlamentare, što je u suprotnosti s međunarodnim pravom, demokratskim vrijednostima i što podriva političku angažiranost i osnove međusobnog poverenja,

**KONSTATIRAMO DODATNO** važnost provođenja Platforme za akciju koja je usvojena na 4. svjetskoj konferenciji o ženama (Peking, 1995.) i završnih dokumenata sa 23. posebne sjednice Generalne skupštine UN-a (2000.) "Žene u 2000. godini: rodna ravnopravnost, razvoj i mir u 21. vijeku", kao i koordinaciju napora međunarodne zajednice pred predstojeći sastanak na visokom nivou povodom 20. godišnjice donošenja Pekinške deklaracije i Platforme za akciju,

#### **NAGLAŠAVAJUĆI POTREBU ZA:**

jačanjem uloge žena u postizanju globalnih ciljeva održivog razvoja i provođenju novog programa UN-a u oblasti razvoja nakon 2015. godine,

svestranim i garantiranim učešćem žena u državnoj upravi i na izborima za sve nivoe vlasti, u društveno-političkom životu i u procesima ekonomskog razvoja i modernizacije; i s tim ciljem, uklanjanja pravnih, administrativnih, kulturnih i ekonomskih barijera za to,

podrškom ekonomskom i poslovnom osnaživanju žena, razvoju ženskog preduzetništva, omogućavanju ženama ravnopravnog pristupa resursima, uključujući: zemljište, kredite, nauku i tehniku, stručno osposobljavanje, informacije, sredstva komunikacije i tržište,

osiguravanjem prava na jednake mogućnosti pri zapošljavanju i izboru zanimanja bez diskriminacije po osnovu spola, osiguravanje uslova za prevazilaženje izazova koji stoje u odnosu između porodice i karijere; dok istovremeno podržavamo konkurentnu poziciju žena na tržištu rada putem profesionalne orijentacije, obuke za nove profesije, profesionalno usavršavanje i prekvalifikacije,

zaštitom života i zdravlja žena, naročito za vrijeme trudnoće i dojenja, sprečavanja širenja bolesti zbog loših socijalnih uslova života među ženama,

prevencijom i eliminacijom svih oblika nasilja nad ženama i djevojčicama, stvaranja uslova za sigurnost žena, uključujući, kao jedan od najvažnijih segmenata pomoći, zemlje koje su

pogođene ratnim sukobima i prirodnim katastrofama, u kojima su majke i djeca najranjiviji i dio društva najviše pogođen patnjama,

hitnim rješavanjem životno važnih problema izbjeglica - žena, djece, omladine, koji su, protivno svojoj volji, bili prisiljeni da napuste svoje domove i traže utočište u drugim zemljama, što je već dovelo do tragičnih incidenata i različitih reakcija u zemljama prijema;

stvaranjem uslova za sigurnost žena, kao jednog od najvažnijih aspekata pomoći zemljama pogođenim oružanim sukobima i prirodnim katastrofama (u tim uslovima najčešće su, kao i ranije, žene i djeca žrtve različitih oblika nasilja),

pružanjem zajedničkog otpora terorističkim organizacijama, međunarodnoj narkomafiji i organiziranom kriminalu (uključujući i gnusno postupanje međunarodnih ekstremističkih grupa u regrutiranju novih članova širom svijeta, uključujući i žensku omladinu, kao i informacije koje su se pojavile o uključivanju djece u proces vojničke obuke),

stvaranjem uslova za sigurnost prehrambenih proizvoda za najranjivije slojeve stanovništva, a naročito za žene i djecu,

preusmjeravanjem ulaganja - u ljude, posebno u djecu i omladinu, u njihovo obrazovanje i vještine, s obzirom na to da je generacija koja raste - najvažniji resurs čovječanstva;

**prihvatamo** posebnu odgovornost i misiju žena za zaštitu zdravlja i vaspitanja djece, zaštitu porodičnih vrijednosti, očuvanje pozitivne moralne i etičke klime u društvu, razvoj državnih i javnih institucija, sprečavanje širenja različitih oblika radikalizma, vjerskog, političkog i ideološkog ekstremizma, alkoholizma, narkomanije i drugih društvenih bolesti našeg vremena,

## **POZIVAMO:**

međunarodne interparlamentarne asocijacije da posebnu pažnju usmjere na zakonodavnu podršku jačanju pravnih, ekonomskih i socijalnih mogućnosti žena da unaprijede sistem zaštite porodice, materinstva i prava djeteta, da omoguće pristupačnu i kvalitetnu zdravstvenu zaštitu i socijalnu pomoć;

da promoviraju kulturni dijalog među narodima, izgrađuju humanitarne veze i razvijaju dobrotvorne aktivnosti te da osiguraju uslove za ove napore,

da se uključe u organizaciju međunarodnih inicijativa za obrazovanje, humanitarne i dobrotvorne aktivnosti, istraživanja aktuelnih izazova ravnopravnosti spolova,

da osmisle platformu za diskusiju i razmjenu informacija i iskustava,

da se drugi Evroazijski forum žena održi u Sankt Petersburgu 2018. godine, priznajući mu status stalnog tijela,

**POZIVAMO** lidere vlada, političke i javne ličnosti, predstavnike naučnih i kulturnih krugova, sredstava javnog informiranja i nevladinog sektora da pruže svu moguću pomoć u promociji i praktičnoj primjeni odredbi ove rezolucije.